

摘藻堂四庫全書薈要

集部

欽定四庫全書薈要卷一萬八千四百六十七

集部

御選元詩卷五十五

七言律詩十四

錢惟善

送曹克明負外之湖廣省

錢塘西望武昌城
天際飛舲幾日程
三峽波濤下江漢
九疑雲霧接巫衡
笑談落落蕭曹佐
登覽蒼蒼屈宋情
更把文風變丹徼
不須銅柱紀南征

早發葑門得風直抵阜林泊

白龍廟前風浪生扁舟初離闔閭城
嬋娟霜月鴈千里顛倒衣裳雞五更
櫓柁漁歌江入夢帆迎野色樹移程
葦間何限秋蕭瑟愁絕胡笳出塞聲

述懷

倦遊湖海十年餘人物如雲想國初
貞觀名臣重房杜建安才子數應徐
聞雞起舞關河壯射虎歸來事業疎
便欲巢松尋五老短檠依舊滿牀書

懷陳子敬王子仁

倦遊年少滯江南憂患驚心百不堪
韶海有人遺白葛洞庭無客寄黃甘
涼風拂袵聽喉嚨夜雨移鐙覆手談
寂寞歲寒梅共我月明索笑碧雲檐

題廣微天師昇龍圖

噓氣乘雲薄太清墨卿靈怪硯池腥
波濤光彩失雙劍風雨晦冥驅六丁
朱火騰空超碧落翠鱗垂水捲滄溟
真人上挾飛仙去安得攀髯過洞庭

奉和太常博士柳公浦陽十詠詩

錄三首

龍峰孤塔

歸然特立梵王宮
梯級惟容鳥道通
翠壁雲綃紅劫火
鐵檐鈴雨落秋風
高標插漢蒼龍左
倒影橫江白鶴東
何日捫蘿尋勝迹
不愁千里目難窮

南江夕照

目盡江南送夕陽
空明直下接魚梁
千重雲岫連平遠
五色霜林映渺茫
孤鷺倒飛天上下
長虹高卧水中央

白雲紅稻多秋思
付與詩翁了醉鄉

東嶺秋陰

青山失色暗丹楓
廣野平林杳靄中
半嶺無雲時慘淡
尺天不雨亦空濛
冥冥南向藏元豹
漠漠東開見白鴻
高處夕佳難攬結
埽除陰翳待雄風

述懷寄光遠并簡城南諸友二首

野人無事久忘機
肯信紛華有是非
花信欲闌鶯百轉
麥芒初長雉雙飛
書中歲月仍為客
枕上江山屢夢歸

時復思君倚深樹不知殘雨溼春衣

青青草色接平蕪翠涌千峰入座隅
戴勝晨呼採桑女於菟夜警牧豬奴
羽觴洛水聞修禊單袷溫泉想舞雩
欲泛蘭舟過春渚一樓煙雨似西湖

送李德夫福建運司書吏

吳柳初黃越樹丹照人秋色送征鞍
雲隨親舍回揚子山引郵城入候官
萬石鹽饒輸海賦兩潮魚上助盤餐
武夷我有南遊約欲借扶搖駕羽翰

九月晦日張機仲同宿明慶亭會堂上人房是
夜讀羅昭諫詩

寶坊金碧近閭閻
閻道沈沈警夜嚴
萬石華鯨驚海獸
四檐鐵鳳語蜚廉
傷時我豈同昭諫
覓句師能及道潛
一榻茶煙清夢熟
因思松瀑灑冰簾

正月十六日遊湖上

東風杖屨偶相從
試傍新隄覓舊蹤
花竹園池通一徑
金銀樓閣倚千峰
林煙日午青先暝
湖水天寒綠未濃

賣酒壚頭人似玉
抱琴時復醉臨卣

送李可度

暫駕仙舟絕海濤
未應歸夢又金鰲
漢家長者為廷尉
江左參軍辟掾曹
十月蛟鼉淮浪靜
九天鷹隼朔雲高
匡時有用須公等
莫遣吳霜點髣毛

送陳衆仲之官翰林應奉

畫蠲齊飛發棹謳
泛江幾日過揚州
曉雲最白梅花驛
春雨初香杜若洲
一代文章闢氣運
十年館閣擅風流

綠波草色連天遠不是尋常送別愁

和李文山齋早春二首

方壺元不離人間倚徧東風十二闌
煙雨樓臺春似畫水雲窓戶晝生寒
遙知洗鼎煎茶待定許敲門借竹看
醉後石橋花爛漫翠禽啁哳在檐端

落梅風細小窓寒石上餘香點點斑
不惜壺觴千日醉只愁庭館一春閒
澗雲生白元非雨江樹排青更有山
攜取畫圖溪上去鶴聲應到夢魂間

晚雨過白塔

宋宮傳是唐朝寺白塔崔嵬寢殿前
夏雨染成千樹綠暮嵐散作一江煙
蒼苔門外銅鋪暗細柳營中畫角傳
寂寞蒹蘆宮井畔野人拾得舊金鈿

送王舉之入京就簡樵谷

短衣匹馬佩吳鉤欲寫關河萬古愁
射雁秋風高紫塞聽鶯春色滿皇州
黃塵驛路三千里白玉京城十二樓
無酒送君懷抱惡過江為覓故人舟

題魯彥康所藏范寬山水手軸

看雲終日坐蒼苔
溪上千峰紫翠堆
種竹人家臨水住
抱琴客子過橋來
欲書盤谷先生序
更把潯陽處士杯
他日卜居能似畫
草堂題作小蓬萊

雨後登吳山過城隍廟眺望

偶向吳山高處望
淒涼猶自覺繁華
百年香火祠神宇
二月笙歌賣酒家
渺渺風帆來海島
冥冥江樹接煙沙
倚闌貪看西湖上
古木荒城日又斜

漁村

丙穴魚來江盡頭
元真卜築更深幽
對門燈火三家市
何處煙波萬里舟
明月竹枝揚子夜
西風木葉洞庭秋
棹歌一曲閑來往
指點儂家鸚鵡洲

一峰晴雪

石名

醉倚崔嵬夢剡溪
覺來翻訝衆峰低
孤標想見天山北
萬里飛來蜀國西
每怪珠光含霽月
不知玉氣吐晴霓
風流欲喚坡仙起
雪浪齋中共品題

送賈元英之照潭

照潭遙望九華山
弓馬蕭蕭日暮還
夢裏無情惟寄內
胸中有策欲平蠻
落花閉戶眠黃犬
明月開籠放白鵬
絳灌何曾輕賈誼
早隨鵷鷺入朝班

清逸齋

神仙官府曾為吏
一日乘風即掉頭
太白豈惟凌鮑謝
元卿只合友羊求
門前種樹雲連屋
湖上聽潮月滿樓
遙憶五經名隱地
我耆高聳蜀天秋

杏花

等鶯期燕引遊蜂知隔垂楊第幾重
壇近緇帷忘晝永
宮催羯鼓助春濃
絳煙輕潤香鬚衰
紅雪乾團粉淚鎔
寂寞曲江人不見
貞元朝士憶時雍

送魏好義尹分水賦十六瀨

東來衆水發新安
歷歷桐川第二灘
萬疊冷雲藏亂石
一江春雨落驚湍
青山隔樹連漁浦
白鳥迎潮入釣壇
地占客星高隱處
時飛鳬鳥上巖端

次陳君瑞遊鳳凰山光明寺

左瞻劒戟龍門並上脫冠巾鳳髻雙齋近木魚鳴晝廡
行遲松鼠落晴窓雲深不覺山藏寺溪漲應隨雨到江
未識此中真樂地三生先喜俗緣降

喜白髮為陳師復賦

勲業無成散似樗青銅欣見二毛初中郎興動秋風起
太傅詩成壯歲餘皎皎易汙時一沐星星難染漫千梳
等閒得此無情物自有忘憂滿架書

張昱

五府驛代楊左丞留題

免胄日趨丞相府解鞍夜宿五侯家
玉杯行酒聽春雨銀燭照人如晚霞
受命敢忘軍旅事撫時又過掖垣花
漢家未可輕韓信尚要生擒李左車

陪宴相府得芍藥花有感賦

醉吐車茵愧不才馬前蝴蝶趁花回
玉瓶盛露扶春起錦帳圍鐙照夜開
垂白敢思溱洧贈敲紅還是廟廊栽

揚州何遜空才思惟對高寒詠閣梅

退居湖上投贈楊左丞二首

樓外湖光白渺茫樓中少婦試新妝行年將近半百歲
大醉豈能千萬場翠織舞袞飛蛺蝶白描歌扇睡鴛鴦
垂楊滿院無人到芍藥花開日正長

且觀神女為行雨莫問郎官應列星芳草到門無俗駕
好山終日在湖亭白鷗共戲荷葉小黃鳥亂啼楊柳青
肯信曲闌干外立晚涼吹得酒初醒

惆悵五首

三山夢斷綵雲空，幾把長牋賦惱公。
畫閣小杯鸚鵡綠，玉盤纖手荔枝紅。
春衫汗浥薔薇露，夜帳香回茉莉風。
惆悵近來江海上，却將鞍馬學從戎。

畫船湖上載春行，日日花香扇底生。
蘇小樓前看洗馬，水仙祠畔坐聞鶯。
碧桃紅杏渾相識，紫燕黃蜂俱有情。
惆悵繁華成逝水，盡歸江海作潮聲。

惆悵當年使酒來，娼樓紅粉夜相催。
可憐明月三分在，

不見瓊花半朶開誰復醉翁堂下柳更堪從事閣中梅
揚揚一片青青草誰信春來無鴈回

惆悵雄藩海上遊武昌佳氣接神州東風歸思王孫草
北渚愁生帝子洲楚國江山真可惜劉家豚犬亦何羞
不須更問中原事官柳新栽過戟樓

至今惆悵在東城結伴看花取次行輦道駐車招飲妓
宮牆回馬聽流鶯星河織女從離別海水蓬萊見淺清
不有酒船三萬斛此生懷抱向誰傾

過楊忠愍公軍府留題

總是田家門下客誰於軍府若為情
林花滿樹鶯都散
雨水平池草自生
街上相逢驚故吏
馬前迎拜泣殘兵
能言樓上題詩處猶有將軍舊姓名

湖舫勸曹德昭僉院酒

倩得名姬唱慢歌
梁塵直欲下輕波
西風八月芰荷老
落日滿湖鳬鴈多
到手莫辭雙盞飲
轉頭又是一年過
光陰只在槐柯上
奈此浮生樂事何

春閨

白日高堂欲暮難，鳴鳩乳燕靜相干。
銀瓶行酒雙鬟綠，玉管調笙十指寒。
蝴蝶每因飛處見，牡丹多是折來看。
明朝為遣安西使，錦字紅鐙織夜闌。

湖上漫興二首

百鎰黃金一笑輕，少年買得是狂名。
尊中酒釀湖波綠，席上人歌鳳語清。
蛺蝶畫羅宮樣扇，珊瑚小柱教坊箏。
南朝舊俗憐輕薄，每到花時別有情。

湖上新泥雪漸融
門前溝水暗相通
裊欺萱草輕盈綠
粉學櫻桃淺淡紅
暮雨欲來銀燭上
春寒猶在酒尊空
青綾被薄不成夢
又是一番花信風

繡球花次烏延廉使韻

繡球春晚欲生寒
滿樹玲瓏雪未乾
落過楊花渾不覺
飛來蝴蝶忽成團
釵頭嬾戴應嫌重
手裏閑拋却好看
天女夜涼乘月到
羽輪偷駐碧闌干

湖樓

樓前芳草碧盈盈付與幽禽自在鳴隄上馬馱紅粉過
湖中人載畫船行日長燕子語偏好風暖楊花體又輕
何限才情被花惱獨教書記得狂名

次林叔大都事韻四首

春來長是誤佳期鵲鳥雄鳩不可私錯認櫻桃懸喜子
悔將衫袖染鵝兒燒殘蠟燭渾成淚折斷蓮莖却是絲
辜負綠窓閒歲月只教楊柳妬腰肢

何處銀鞍白鼻騮忘將錦瑟數年華渡頭水急憐桃葉

陌上春狂信柳花那得芳心對鸚鵡泣將殘淚付琵琶
一身已是成惆悵況是平陽十萬家

莫謾題情在粉牆藕絲終日繫柔腸不知漢主黃金屋
何似盧家白玉堂好夢自拋桃葉後閑愁似過柳條長
無端收得番羅帕徹夜薔薇露水香

陳王當日賦凌波寫得風流也太多掌上玉鸞看教舞
雲中青鳥使傳歌情緘尺素魚中字恨織迴文錦上梭
休信雙星是牛女年年波浪隔天河

昔遊

春到名園總是花
都城無處不繁華
冠翹鷗尾朱袍盛
馬頓金羈玉面斜
騎吏去忙官索酒
侯門散晚妓留車
党家賤妾麤豪慣
輕易銀瓶雪水茶

兩山亭留題

馬頭曾為使君回
北望新亭道路開
於越地形緣海盡
勾吳山色過江來
英雄有恨餘湖水
天地忘懷入酒杯
珍重謝家林下客
玉山何待倩人推

三月三日湖上作

此日誰人肯在家，傾城滿意事繁華。
時非上巳不為節，春到牡丹纔是花。
霧鬢風鬟湖上女，畫輪繡轂道傍車。
兒童盡唱銅鞮曲，未覺人間日易斜。

西湖漫興

玉局當年為寫真，西施宜笑復宜顰。
朝雲暮雨空前夢，桃葉柳枝如故人。
露電光陰千劫外，魚龍波浪一番新。
傷心最是林逋宅，半畝殘梅共晚春。

晚歸

左掖歸時日未斜
小園檢點舊生涯
染袞萱草纔抽綠
破雪櫻桃又著花
玉笋試斟官給酒
銀煎重瀹貢餘茶
西湖水色春來好
說道風光似謝家

鄰園海棠

自家池館久荒涼
却過鄰園看海棠
日色未嫣紅錦被
露華猶溼紫羅囊
掌中飛燕還能舞
夢裏朝雲自有香
銀燭莫辭深夜照
幾多佳麗負春光

醉題

二月鶯聲最好聽
風光終日在湖亭
清宵酒壓楊花夢
細雨燈深孔雀屏
情在綢繆歌白苧
心同慷慨贈青萍
方平自得麻姑信
從此人間見客星

感事

憶昔銀燈鼓瑟琴
屏開孔雀畫堂深
頭顱謾有新添雪
囊橐都無舊賜金
好夢未成春漏盡
殘星猶在曉河沈
郎君自上斑駝後
露滴銅盤淚不禁

碧筩飲次胡丞韻

小刺攢攢綠滿莖
看揎羅袖護輕盈
分司御史心先醉
多病相如渴又生
銀浦流雲雖有態
銅盤清露寂無聲
當年欲博千金笑
故作風荷帶雨傾

贈沈生還江州

鄉心正爾怯高樓
况復樓中賦遠遊
客裏登臨俱是感
人間送別不宜秋
風前落葉隨車滿
日下浮雲共水流
知汝琵琶亭畔去
白頭司馬憶江州

贈寓客還瓜州

把酒臨風聽櫂聲
河邊官柳綠相迎
幾潮路到瓜州渡
隔岸山連鐵甕城
月色夜留江叟笛
花枝春覆市樓簷
贈行不用歌楊柳
此日還家足太平

無題

灼灼庭花露未收
樂然雙燕語綢繆
新妝滿面猶看鏡
殘夢闌心嬾下樓
春到自憐人似玉
困來誰問酒扶頭
狂蹤已作風絲斷
敢怨流年似水流

無題

咫尺香閨步嬾移
搔頭誰理玉蟠螭
不聽小管吹銀字
只數迴文織錦詩
得伴有時惟鬪草
遣懷無日不彈碁
鳴鳩乳燕青春晚
謝却繁花幾萬枝

金山寺

六鼇捧出法王宮
樓閣居然積浪中
門外鷗眠春水碧
堂前僧散夕陽紅
揚州城郭高低樹
瓜步帆檣上下風
人世幾回江上夢
不堪垂老送飛鴻

演法師惠紙帳

銀燈夜照白紛紛四面光搖白縠文
隔枕不聞巫峽雨繞牀惟走剡溪雲
風和柳絮何因到月與梅花竟不分
塞北江南風景別却思羶帳舊從軍

寄東山寺長老宅區中索畫梅

同是多生無垢身孤芳歲晏轉精神
濡毫應覺香先到寫影無如月最真
庾嶺近來還有信華光以後更何人
情知此事難描畫驛使空回可不嗔

寄王梧溪

仙舟曾記過南堂
鳴鳥高梧日正長
蝴蝶重來春夢覺
牡丹欲盡燕泥忙
當時賓客知何在此
日音書或漫忘
猶有白頭王粲在
獨將詞賦動江鄉

如此江山清集同王仲玉陸進之呂世臣作

吳越江山會此亭
暮春風景畫冥冥
長空孤鳥望中沒
落日數峰烟外青
不用登臨生感慨
且憑談笑慰飄零
古今何限英雄恨
付與江湖醉客聽

王逢

過丘以敬管勾吳山別業

梓潼祠畔敞林扉，隱隱雞聲落翠微。
銅篆解將還省署，銀魚忘却挂朝衣。
石崖溜雨藤根白，籬落緣雲瓠子肥。
想見秋風遂高隱，中原野馬正狂飛。

夜宴葉氏莊曉登悠然樓作

百尺飛樓俯碧湍，六峰秀色繞闌干。
杏花落盡東風惡，燕子歸來社雨寒。
夢裏香煙生繡幌，酒醒紅蠟膩銅盤。

一春樂意朝來好千里家書席上看

送朱自明辟閩憲奏差

閩中烏府小清都列郡山巒紫翠紆王化直來天北極
文星多聚海南隅暖塵花氣隨驄馬春日榕陰滿鷓鴣
况有翰林持使節憲郎應得效馳驅

奉題先世所藏嚴子陵小像

千仞臺臨七里灘羊裘鶴髮老漁竿客星帝座分天象
潁水箕山並曉寒遂起後塵甘黨錮尚存餘烈愧南冠

桂叢茅薺蘋花薄悵望高風一羽翰

客金陵遇有以茂才異等為薦者以病歸泊龍
灣二首寄丁仲容婁行所二先輩

拖樓醺酒出金陵病後衣裳體不勝風雨滿江寒
庭幃何處髮鬢髭周珍寶下諸侯榻王式虛蒙博
士徵一曲離歌凝客思幾行疎樹隔漁燈

鳳皇臺上酒如川醉擬題詩李謫仙鑿齒已成耆
舊傳真長空覓孝廉船十年螢案書連屋八月龍
灣浪拍天

無那病懷兼旅思白雲遙望夕陽邊

簡陳韋羌負外

幕府深嚴午漏遲簾文簾影碧參差總傳白馬陳從事
每念青袍杜拾遺大地風塵憂未解扁舟江海去無期
涼天鴈叫芙蓉發許奏軍中鼓吹辭

陪淮南僚友汎舟吳江城下

波伏魚龍夜不驚菱花千頃湛虛明吳儂似怪青絲馬
漢月重臨白帝城世說竇融功第一獨憐阮籍醉平生

樓船簫鼓中流發喜及東南早罷兵

冥鴻亭偶題二首

時歲
戊戌

春陰過却幾番風野店山櫻霧雨中新水綠塘鵝並浴
嫩寒茅閣燕微通大兒稍熟春秋例幼女歡趨組繡功
四十今年渾意足酒炊香滿巷西東

一家無事樂清寧寄目冥鴻野外亭江水未分南北限
月明常後畢箕星子生猫櫟垂垂赤蔓長鴉藤故故青
天意物情應有在且須料理相牛經

聞何上海子敬毀淫祠開鄉校因寄四韻

魚米駢登橘柚垂
備聞佳政起深思
女巫罷進神弦曲
鄉校新陳魯頌詩
風葉晝埋公館靜
霜鐘寒度海雲遲
高天鴻鵠東回首
亦欲朝陽借一枝

無錫寓隱謝王左丞彥熙攜酒饌遠過

玉帳旂旌拂紫冥
樓船神物護青萍
風雲密擁將軍樹
江海孤懸處士星
深愧草茅優簡拔
未忘蒲柳易飄零
竹西歌吹高陽酒
喜為尋春過野亭

送吳照磨赴李司徒幕兼簡張郎中

司徒分鎮越王臺
甌婺山光入望來
堂上修文閑將畧
幕中求舊得賢才
鑑湖水落魚梁見
紫塞風高鴈路開
莫禁白頭狂賀老
酒船仍蕩月明回

寄陸宅之進士錢思復提學全希言學正

花開花落雪盈顱
三地相望一信無
梁震不慙前進士
杜陵寧是老狂夫
長淮浪接江逾闊
南極星聯斗不孤
想與窮經全學正
酒香鄰社杖同扶

經遊小來涇簡木仲毅

髯參歸隱小郊坳
亂日曾聞險備經
風黑浪高羅刹海
月明天度使臣星
東都先見逢萌得
廣武重游阮籍醒
最是故家春草暗
杜鵑啼殺忍同聽

書西厦時沿海築城

牀頭鴟卧久空金
辟上蝸行尚有琴
孺子成名狂阮籍
霸才無主老陳琳
虹霓氣冠登萊市
蝙蝠群飛顧陸林
環海煙沙翻萬畝
連村霜月抱孤衾

戴良

次韻遊寶華寺

失脚江湖髻欲華，尋僧姑啜趙州茶。
卓泉不復聞飛錫，說法空傳見雨花。
水樂隔林迷梵唄，雲衣入戶亂袈裟。
同遊賴有蘭臺客，時出新詩鬪綵霞。

黑水洋

涉海纔經五日期，深洋一望黑淋漓。
波搖月色人先見，船過雨天龍未知。
險勝呂梁漂鷁處，悲同巫峽泣猿時。

平生一段乘桴意莫為微軀到此疑

偶書

自從北渡浣紗溪十載家山入望低
失學已憐元亮子長齋應愧太常妻
百年世事醯雞變一夜鄉心謝豹啼
却向歸塗望遼鶴白頭和淚寫淒迷

寄胡仲孚

客裏遊從近十年一時朋舊羨君賢
學通上古長桑術道悟南華散櫟篇
交久直看書似筍愛深時借筆如椽

白頭歸倚西風立一度相思一惘然

承君衡叔幹遠送賦此以別

長風吹度海東邊慣聽潮聲已十年往事免成塵撲面
新愁惟有雪盈顛半生望眼迷遼鶴一夜歸心到蜀鵲
遠賦驪駒慙二妙縱歌安得酒如川

寄胡舜咨

曾著宮袍賦上林一朝歸卧白雲深昂昂老鶴鳴臯態
耿耿驚鴻避弋心病起尚餘頒送藥客過時共賜來金

鄉邦珍重斯文寄莫為愁多髻雪侵

寄俞伯熊兼柬李仲彬

東郭先生最老成天才久已負時名
詩不減唐工部解酒渾如晉步兵
塞上征鴻高避弋海東歸鶴暗聞聲
比鄰喜有知心客一夜彈碁直到明

顧瑛

和韻二首

喔喔雞鳴桑樹顛江村風景只依然
人行紅葉黃花裏

鴈過西風落日邊
南市津頭無酒旆
東湖渡口有魚船
北山巖壑秋偏靜
偕看蒲團枕石眠

夏潮平沒白鷗沙
舶艖風生起浪花
為向船頭置美酒
恰如天上沉浮槎
銀盤雪落千絲鱠
玉手冰分五色瓜
明日山中看疎雨
共將詩句寄丹霞

送吳國良

桐軒隱者重相訪
草閣能留十日歸
快雪半消春水闊
扁舟又逐白鷗飛
似聞迂叟耕梅里
每過山家款竹扉

期子幾時來慰我共披鶴氅坐漁磯

海洲夜景

三沙宛在海當中隱見珊瑚樹色紅
神島由來連弱水樓船欲去引剛風
東方日出鮫人國半夜潮生織女宮
却憶題詩繡衣使高秋會過玉山東

天寶宮詞十二首寓感

錄四首

蓮花池畔暑風涼玉竹迴文寶簾光
貪倚畫屏調翡翠誤開金鎖放鴛鴦
輕綃披霧誇新浴墮髻欹雲銜晚妝

笑指女牛私語處長生殿下月中央

五色卿雲護帝城春風無處不關情小花靜院偷吹笛
淡月閒房背合箏鳳爪擘柑封鈿合龍頭瀉酒下瑤罌
後宮學做金錢會香水蘭盆浴化生

祕閣香殘日影移燈分青玉刻蟠螭琵琶鳳結紅文木
絃索蠶繅綠水絲金屋有花頻賭酒玉枰無子不彈碁
傳宣趣發明馳使南海今年進荔支

虢國來朝不動塵障泥一色繡麒麟朱衣小隊高呵道

粉筆新圖徧寫真寶雀玉蟬簪翠髻銀鵝金鳳踏文茵
一從羯鼓催春後不信司花別有神

癸卯除夕

仰觀北斗轉遙天春在寒爐爆竹邊夜列粉盤循舊俗
曉看羅帕賀新年燒餘葦蔴生當路雪後梅花開滿煙
不用鞭灰覓如願客囊剩有酒家錢

夜宿三塔次陳元朗韻

水落南湖不露沙又牽舫子到僧家春浮大斗娟娟酒

寒隔虛櫺薄薄紗
半夜塔鈴傳梵語
一林江月照梅花
坐來詩句生枯吻
指點銀瓶索煮茶

寄鄭明德

我愛塵居鄭有道
屢辭徵幣卧松雲
年來短髮籠紗帽
客至新詩寫練裙
几上只留招隱賦
人前每讀送窮文
清時已見文名盛
日日高車訪隱君

戲荅陸靜遠

秋水藍橋一尺強
愁聞玉杵搗元霜
東籬老子烏紗薄

西郭佳人翠袖長
古寺竹深禪榻靜
晴窓花落硯池香
西風鶴背三更夢
笑看瓊花作醉鄉

堯文文學過訪賦別兼簡鶴齋薛真人

憶昨相過寂寞濱
白頭傾蓋豈如新
驚回赤壁三更夢
開徧桃花一度春
顧我老為思櫪馬
憐君遠作倚樓人
黃公壚畔三株樹
留待來時醉挂巾

次韻永嘉曹新民玉山席上作

詩人得句題茅屋
客子乘流泛小舫
老眼看花起春霧

醉眠聽雨響秋濤
弓盤舞按銀鵝隊
水調聲傳金鳳槽
與爾共傾千日酒
呼童換却五雲袍

以炯如流水涵青蘋分韻得流字

幽人雅愛玉山好
肯作清酣竟日留
梧竹一庭涼欲雨
池臺五月氣涵秋
月中獨鶴如人立
花外疎螢入幔流
莫笑虎頭癡絕甚
題詩直欲擬湯休

以冰衡玉壺縣清秋分韻得壺字

鄭元于鵠本清好
况有名僧似仲殊
濠上魚肥應受釣

廚中酒熟莫教酤
雨花落座成金粟
秋露凝寒貯玉壺
更向飛樓睹碁槩
香囊留得未全輸

和繆叔正韻

白雲開處見山稜
我欲躋攀力未勝
歲晚不為干祿士
前身應是小乘僧
竹林載酒邀山簡
草閣裁詩愧薛能
結習未除閒未盡
焚香且對佛前燈

和柑字韻

一飲寧辭十日酣
濁醪到手味偏甘
新詩謾賦宮槐陌

好事爭傳海岳菴霜後兩螯看紫蟹尊前一味出黃柑
料應堂北梅花樹今歲開時只向南

以危樓高百尺分韻得危字

并序

七月初五日予會于匡山琦龍門於樓上輕風吹
衣爽氣浮動纖月既出乃移尊樓外閣橋團飲時
瑤笙與琴聲歌聲齊發泠泠天表如霓裳羽衣落
我清夢遂各賦詩以紀

樓上笙歌合奏時湖山當席最相宜風吹輕袂身疑舉

人立飛橋意不危
蜃氣欲浮河漢動
秋光已近女牛期
潘郎容易頭如雪
且醉花前雙玉卮

春暉樓以攀桂仰天高分韻得高字

朱樓隔水度飛橋
翫月張筵快酒豪
同向鏡中看玉兔
恰如海上踏金黿
影搖大地山河動
光射元洲殿宇高
明日中秋湖上去
更攜紅袖泛輕舸

七月九日復飲秋華亭
上天香襲人幽花倚石
時猩紅軋琴寶箏合曲
瓊花起舞蘭陵美人度

觴與琦龍門行酒余為作詩以紀良會就邀匡

山龍門同韻

又到秋華亭子上東山爽氣正清妍
堦前落葉不須埽石上幽花自可憐
越國女兒嬌娜娜蘭陵酒色淨娟娟
深尊賸有清香在留待瑤笙月下傳

春草池綠波亭以銀漢無聲轉玉盤分韻得聲
字

據牀坐看月華生水氣浮空夜氣清
蜃闕珠宮寒作市

銀盤玉露靜無聲
芳筵累吸杯中物
彩鳳雙吹樹底笙
不見山陰狂道士
相思只在越王城

次琦元璞韻

去歲一春同作客
今春相見却身閒
亭開翠柳紅桃外
魚躍綠波春草間
自笑淵明居栗里
也隨惠遠入廬山
何當共下吳江釣
坐向船頭語八還

送鄭同夫歸豫章分題得洞庭湖

五湖秋水洞庭煙
七十二峰青插天
神禹書藏林屋裏

仙人詩刻石屏前
溫溫玉氣穿
靈洞白白銀河瀉
瀑泉鴻鴈來時木
葉下送君晨發楚
江船

次龍門琦公見寄韻二首

扁舟遠適越溪濱
雙槳驚飛白鷺羣
要趁秋江三尺水
去看山寺九峰雲
西風網罟沿村集
落日鐘聲隔水聞
好對黃花同一醉
故園晴色晚如熏

秋花楓葉暗江濱
萬里西風鴈叫群
謾是羈情濃似酒
獨憐世事薄於雲
九龍山色船頭看
半夜鐘聲枕上聞

料得高僧禪定處松窓柏子起濃熏

九月七日復遊寒泉登南峰有懷龍門雲臺二
首

春遊憶得到寒泉正值鶯花過禁烟楊柳樓中金錯落
琵琶船裏玉嬋娟潘郎別去渾多病道士重來是有緣
今日登高能作賦雲臺不見使人憐

又向江頭載夕暉好懷每與世相違客中重九明朝是
眼底故人今日稀過雨黃花千蕊發經霜紫蟹兩螯肥

秋江更待澄如練擊楫中流緩緩歸

倪瓚

北里

舍北舍南來往少自無人覓野夫家鳩鳴桑上還催種
人語煙中始焙茶池水雲籠芳草色井牀露淨碧桐花
練衣挂石生幽夢睡起行吟到日斜

山園

春水鳬鷺野外堂山園細露橘花香棲棲身世書盈篋

漠漠風煙酒一觴
豈謂任真無禮法也
須從俗著冠裳
不營產業人應笑
竹本桃栽已就行

林下遣興

眼見藤梢已過牆
手拈書卷復堆牀
閒臨水檻親魚鳥
欲出柴門畏虎狼
冠製不嫌龜殼小
衣裘新翦鶴翎長
從來任拙唯疎嬾
一月秋陰不下堂

春日

閉門積雨生幽草
歎息櫻桃爛漫開
春淺不知寒食近

水深唯有白鷗來即看垂柳侵磯石已有飛花拂酒杯
今日新晴見山色還須拄杖蹋青苔

二月十日元文館聽雨

卧聽夜雨鳴高屋忽憶陂塘春水生何意遠林飢獨鶴
若為幽谷滯流鶯成叢枸杞還堪采滿樹櫻桃空復情
二月江頭風浪急無機鷗鳥亦頻驚

雪後過陳子貞隱居

陶公卜宅南村裏快雪初晴思一遊樹辨微茫來獨鶴

櫓搖鼓側散輕鷗墨池繞溜春冰滿塵榻繙書夕照收
相見惘然如有失掉頭吟詠出林丘

次韻薩天錫寄張外史

谷口路微山木合濕衣空翠不曾晴飢猿扳檻為人立
寒犬號林如豹聲小閣秋清聽雨卧長空日出採芝行
道心得失已無夢沐髮朝真候五更

寄熙本明

在山無事入城中每問歸樵得信通松室夜鐙禪影瘦

石潭秋水道心空幽扉獨掩林間雨疎磬遙傳谷口風
幾度行吟欲相覓亂流深澗隔西東

寄張貞居

不但入城蹤跡少南鄰野老見猶稀狂歌鳴鳳聊自慰
舊學屠龍良已非蒼蘚渾封麋鹿逕白雲新補薜蘿衣
羊君筆札誰能繼欲讀靈文一扣扉

贈別孟以道書記

一笑相逢豈有期因懷西崦話移時李公祠畔空餘月

陸子泉頭舊有詩
旅思悽悽非中酒
人情落落似殘棋
雲濤眼底三生夢
鷗影秋汀又遠離

送寶南琛往住荆溪碧雲寺兼簡方厓

碧雲林壑杳重重
此去風流似簡公
春藥碓閑湍激下
吟秋蛩響月明中
結茅擬候芝三秀
眠鹿應遺地一弓
聞道重居開竹牖
待予艇子過溪東

奉和虞學士寄張外史

華陽上館誰曾到
知有高人避世深
當戶春雲團紫蓋

洗空花雨散青林
丹臺篆跡龍蛇動
經閣松聲鸞鶴吟
念子離居消息遠
幾將書札寄遙岑

春日試筆

喜看新酒似鶯黃
已有春風拂草堂
二月江南初變柳
扁舟晚下獨鳴榔
苔生不礙山人屐
花發應連野老牆
美酒已擽千日醉
莫將時事攪愁腸

寄張天民先生

清溪演漾綠生蘋
溪上軒楹發興新
只欠竹陰垂北牖

儘多山色近南津
湖魚入饌長留客
沙鳥緣階不畏人
愧我萍踪此淹泊
片雲回首一傷神

居竹軒

翠竹如雲江水春
結茅依竹住江濱
階前迸筍從侵徑
雨後垂陰欲覆鄰
映葉黃鸝還自語
傍人白鶴亦能馴
遙知靜者忘聲色
滿屋清風未覺貧

送張練師遊七閩

高士不羈如野鶴
忽思閩海重經過
舟前春水他鄉遠

雪後晴山何處多
鰕觿卧雲芳草細
鉤輶嘯樹野煙和
武陵九曲最清絕
落日采蘋聞棹歌

寄張德常

身世蕭蕭一羽輕
白螺杯裏酌滄瀛
逍遙自足忘鵬鷃
漫浪何須記姓名
石鼎煮雲聽夜雨
玉笙吹月和松聲
憑君為問張公子
曾到良常夢亦清

題張以中野亭

人境曠無車馬雜
軒楹只在第三橋
開門草色侵書幌

隔水松聲和玉簫一榻雲山供夏簟滿江煙雨看春潮
君能擷取飛霞佩天際真人近可招

題孫氏雪林小隱圖

天地飄搖一短篷小窓虛白地鑪紅脩然忽起梨雲夢
不定仍因柳絮風鶴影襍褊簷上下鹿迹散漫屋西東
杜門我自無干請閑寫芭蕉入畫中

上巳日感懷

石梁破屋路欹斜似華陽道士家漠漠春雲飛別鶴

潺潺夜雨雜鳴蛙閒看稚子翻書葉時有鄰翁汲井花
日暮傷心江水綠共舟人已躡飛霞

喜謝仲野見過

階下櫻桃已著花窓前野客獨思家故人攜手踏江路
拄杖敲門驚夢華藉草悲歌聲激烈停杯寫竹字敲斜
新蒲細柳依依綠西北浮雲望眼遮

寄盧士行

闔閭浦口路依微笠澤汀邊白板扉照夜風燈人獨宿

打窓江雨鶴相依畏途豈有新知樂老境空思故里歸
擬問桃花泛春水船頭浪暖鰕魚肥

送徐子素

山館留君才一月梅花無數倚霜晴垂簾幽閣團雲影
貯火茶鑪作雨聲深竹每容馴鹿卧青山時與道人行
歸舟載得梁溪雪惆悵鄰雞月四更

三月一日自松陵過華亭

竹西鶯語太丁寧斜日山光澹翠屏春與繁花俱欲謝

愁如中酒不能醒
鷗明野水孤帆影
鶻沒長天遠樹青
舟楫何堪久留滯
更窮幽賞過華亭

次韻邵生

已從鷗鳥狎雲深
老我無機似漢陰
采采菊花猶滿地
蕭蕭霜髮不勝簪
南遊阻絕傷多壘
北望艱危折寸心
好在吳淞江水上
青猿嘯處有楓林

別章鍊師

方舟共濟春江闊
訪我寒煙菰葦中
鼓柁斜衝蘋葉雨

鈎簾半怯杏花風
仙人壇上芝應碧
玉女窓中桃未紅
擬趁輕帆數來往
縹壺不惜酒如空

寄養正

得君佳句清如玉
秋色驚人換物華
老境侵尋真有感
故園隔絕更興嗟
女蘿綠徧牽茅屋
烏柏紅明映落霞
欲酌一尊澆磊塊
幾時邀子過田家

贈岳松澗

曾訪神仙五粒松
澗泉流潤白雲封
林間蘿蔦交青影

石上菖蒲開紫茸煮石有方留祕訣采苓何處覓行蹤
岳君別我三千歲晚戲滄洲又汝逢

送僧遊天台次張外史韻

四明山水名天下師去那知客路遙雪霽驚麕騰宿莽
月明寒鵲集疎條坐尋雲頂千峰石歸趁江頭八月潮
說與住山光老子送賓也合過溪橋

過許生茅屋看竹

舟過山西已夕曛許生茅屋遠人群鑿池數尺通野水

開牖一規留白雲煮藥煙輕衝竈出碓茶聲遠隔溪聞
可憐也有王猷興階下新移少此君

寄德朋

故人欲問梁鴻宅遺跡猶應杵臼存楓葉菊花秋瑟瑟
荒園廢圃雨昏昏農人掩舍春明墅縣吏催租夜打門
唯有德朋多遠思賦詩刻燭酒重溫

與伯雨登溪山勝槩樓

樓下清溪夏亦寒溪頭箇箇白鷗閑風回綠卷平隄水

林缺青分隔岸山若士振衣千仞表何人泛宅五湖間
絕憐與子同清賞擬向雲霄共往還

和華以愚韻兼題所畫春山高士圖

扁舟溪上數來過白髮殘春奈我何柳絮如煙迷曉浦
杏花飛雪點春波林扉有客圖丘壑石室何人帶女蘿
欲和華山高隱曲羈愁悽斷不成歌

故吾

縹緲青山日欲晡瀰漫秋水興何孤鶴歸城郭生新夢

塵掩圖書尚故吾
南畝藝田傷碩鼠
北窓臨澗聽嘯鳥
醉歸倘乞封侯地
便復移家傍酒壚

因吳國良過玉山草堂輒賦長句奉寄

玉山樹色隱朝陽
更著漁莊近草堂
何處唱歌聲款乃
隔雲濯足向滄浪
珍羞每送青絲絡
佳句多投古錦囊
幾問棹船尋好事
辟疆園圃定非常

東林隱所寄陸徵士

侵扉桃李晝陰陰
耕鑿居人有遠心
一夜池塘春草綠

孤村風雨落花深不嗔野老群爭席時有遊魚出聽琴
白髮多情陸徵士松間石上續幽吟

次韻鄭九成見寄

郭外青山舊結廬微茫野徑望中無殘生竟抱煙霞癖
好事猶傳海岳圖夜辟松風懸雅樂秋池菊水酌商觚
儻從世事求元賞好趁輕舟看浴鳬

懷歸

久客懷歸思惘然松間茆屋女蘿牽三杯桃李春風酒

一榻菰蒲夜雨船鴻迹偶曾留雪渚鶴情原只在芝田
他鄉未若還家樂綠樹年年叫杜鵑

送元度北遊

荷鍤空林春雨餘艤舟沙岸燕飛初去尋天上仙人佩
肯顧山中隱者居霜月四更提劍舞田園二頃帶經鋤
蘭榮柳密南簷下佇子雲間枉尺書

薩仲明為丞相府掾時僦居京師名其軒曰半
野後買宅延陵亦揭是名於軒因雨宿其下遂

為賦詩云

何意開軒名半野身存魏闕思江湖斜侵瓜圃通花藥
稍傍薇垣近竹梧千里秋風催斫鱸九霄晨露浥飛鳧
如今別買荒城宅自埽風林候野夫

送別甘允從

來從墨沼雲林下共愛女蘿緣石牀喚人鸚鵡語猶澀
當戶枇杷子半黃奉橘定應題百顆籠鵲即欲寫千行
蘭亭書法人間少好去山陰泛野航

賦句曲外史精舍

道士朝乘一鶴還樓臺金碧鎖空山
半天花雨飛幢節萬壑松風雜佩環
丹井夜寒光剌剌石壇春靜蘚斑斑
飄然便擬從君隱分我元洲一半閒

九日

自笑不能孤九日一壺濁酒對西山
遙憐玉樹秋風裏靜看冥鴻落日間
草木蕭蕭雲更碧山川漠漠鳥飛還
長途誰是陶彭澤被褐行吟意自閒

賦謝陸繼之紫蟹黃柑之貺

闔閭城外皆秋水斜日維舟方醉眠攜手故人驚夢裏
送書飛鴈落尊前黃柑開裏煩相贈紫蟹傾筐也可憐
憶爾獨居湖上宅晴窓奇石畫生煙

晨起一首寄丹丘

竹窓晨起聞幽鳥深巷絕無車馬喧多病馬卿非不遇
歸田陶令自忘言牆陰薯蕷苗方茁雨裏櫻桃花正繁
一月陰寒少晴日坐看春水上柴門

御選元詩卷五十五

謹案卷五十四第三十一頁後七行身蛻枯蟬忽
若癡刊本蛻訛脫據楊維禎鐵崖集改

第三十三頁後七行風清菰米香生夜月白蘆花
夢繞春按楊維禎集風清作飯蒸月白作被攤
今仍刊本

卷五十五第二十八頁後三行又到秋華亭子上
東山爽氣正清妍刊本爽作秋據顧瑛玉山璞
藁改


第二十九頁前八行五湖秋水洞庭煙七十二峰

青插天刊本青作秋據顧瑛玉山璞藁改

第三十頁後五行池水雲籠芳草色刊本色訛氣

據倪瓚清閨閣稿改





總校官庶吉士臣侍朝

校對官檢討臣蕭九成

謄錄監生臣朱文佐

欽定四庫全書薈要

集部

御選元詩卷五十六

詳校官原任主事_臣李斯咏

欽定四庫全書薈要卷一萬八千四百六十八

集部

御選元詩卷五十六

七言律詩十五

鄭韶

和張伯雨雲林席間韻

句曲先生世所憐
新詩字字總清妍
楚江祇漫聽春雨
蜀土那知有漏天
樹隔青山迎好客
華開白日照芳筵
高居更憶雲林子
目送冥鴻揮五絃

用楊鐵厓新居書畫船亭韻與玉山同賦

越來溪上暮潮過，飲馬橋頭春水波。
出郭喜知塵事少，吹簫無奈月明多。
華飛斷岸衝歸燕，柳蔭長溝泛白鷺。
儼送一琴臨水榭，扣弦同奏竹枝歌。

卜築喜過楊子宅，城居曲曲抱溪流。
夕陽在波人影亂，秋水上簾竹色幽。
載酒過門從問字，據牀吹笛不驚鷗。
月明後夜溪山雪，乘興還能具小舟。

題三沙

三洲宛在碧波中海色晴霞絢爛紅夜半雞鳴先見日
天邊月暈又生風鮫女機絲花隔霧龍君城闕水為宮
誰持玉節尋真去直過扶桑弱水東

龍門山中即事

雷雨過厓驚落湍空林白晝忽生寒陰陰草閣開尊坐
細細山雲卷幔看落日樵聲經木末青天鳥道挂簷端
亦知吏隱非吾事直欲從茲賦考槃

送丁彥祥入京兼呈危太樸應奉

畫角城頭烏亂啼客行秋日思淒淒黃河一水青天上
蔥嶺諸山大漠西飲馬窟深沙草淺射雕風急暮雲低
經時不見危供奉想候都門踏雪泥

述懷寄倪元鎮

隱吏重來學灌園輟耕時與野人言衡門謾有車馬集
廚廩都無鳥雀喧夜榻張燈鈔籀史飲瓢分水注陶尊
欲乘艇子梁溪去稍待春潮擊樹根

題仙山圖

華蓋諸峰積翠遙中天樓觀陟宮堯白雲窈窕生晴谷
春渚微茫落暮潮歸鶴只棲元圃樹幽人時過赤闌橋
相逢願接飛霞佩早晚飈車會見招

為郇道士賦鍾山

每向鍾山賦草堂遠林佳樹色蒼蒼石橋夜迴星河澹
仙井潮生雨氣涼坐見青松將子落行看老鶴與人長
釣泉擬解塵纓濯躡屩還趨千仞岡

送僧歸溫州

上人靈鷲峰頭客歸去秋風鴈宕南山沃謝公行處屐
洞留覺祖去時龕海汀潮白秋波亂隴樹天青夕照含
莫怪題詩重相憶頻年有約寄黃柑

遊弁山黃龍洞簡趙仲光

石洞陰陰海氣寒絕厓千尺落奔湍白飈飛燕空中見
黑入潛蛟地底蟠陟險未窮雙蠟屐放形自笑一儒冠
十年來往青山路依舊黃塵沒馬鞍

送張大使之湖湘監稅

學士諸孫不乏賢
司征猶得紀山川
行人西入湘江路
賈客南通下蜀船
倚竹哦詩春過雨
隔江聽瑟暝浮煙
相思莫寄衡陽雁
待得新秋又一年

寄范叔豹

江上霜寒木葉彫
憶君何處思迢迢
長年旅食同秋鴈
故里風煙隔暮潮
甚欲寄書酬遠別
絕憐把燭待清宵
雙溪月色涼如水
誰採瓊芳慰寂寥

苔溪草堂為范叔豹賦

徵君家住白蘋溪，煙霧蕭蕭萬竹迷。
茅屋秋風遼海闊，錦城秋色傍人低。
朝來把釣頻維櫂，雨過看山獨杖藜。
傳得杜陵千古意，肯容投老遂幽棲。

次韻楊子壽同浦太守遊顧園四首

辟疆園裏好花開，路隔仙源一水回。
春暖鳬鷺當檻浴，草青蝴蝶上衣來。
柘枝屢舞團團扇，竹葉深傾盃盃杯。
何事綠波生浩蕩，畫橋風急綵舟迴。

厭厭行酒日西斜，太守風流兩髩華。
簫引鳳皇停夜月，

杯傳鸚鵡泛流霞飛花半入長洲苑歸燕空思王謝家
剪盡綠楊三萬樹暖風吹絮滿天涯

望中煙雨赤闌橋芳草行人去路遙翠壁流泉通地底
青林虛閣轉山腰遲遲綵艇香風度濫濫金塘柳色饒
何處隔樓聞笑語玉人徐按紫瓊簫

石洞陰陰雪乍融溪虛弱柳不禁風花飛草閣通歸燕
舟泊晴江見斷虹甚欲題詩春竹裏不堪吹笛水煙中
歸來坐對高城晚門外烏啼月照空

次韻聶茂宣見貽就簡陸伯淵

揚雄宅裏曾相識甫里祠前會面時
白日過門應問字青春別墅只圍碁
隔溪水漲桃花屋深蒼雞鳴桑樹枝
甚欲相從二三子篝燈細雨共談詩

題漁家壁

漫郎家住黃泗浦閒看飛花坐北窓
渡口青山高似屋門前湖水直通江
垂楊繫艇已千尺春鯉上盤纔一雙
野老相過無一事白頭喜對酒盈缸

衡門書事二首

風雨衡茅深復深，朝來隱几獨長吟。
正憐靜裏耽詩癖，忽喜門前有足音。
爨下焦桐彈別鶴，篋中繭紙寫來禽。
南山千古悠然意，惆悵何人識此心。

門巷青苔積雨深，林花落盡一鶯吟。
高情不鼓南薰調，長日只聞流水音。
澗底青絲牽弱荇，窓前碧色護來禽。
莫嫌身外求名遠，自是幽居愜素心。

寄唐子華縣令兼簡趙李文從事

鄉里衣冠日已疎歸來俯仰十年餘蒼筠獨喜經秋後
白髮休嫌把鏡初猶子總傳韋偃畫諸孫只守鄴侯書
西鄰從事耽詩癖日日過門應下車

送僧遊廬山將之西蜀謁玉泉尊者

聞道山人廬阜去遠從西蜀陟崔嵬舟行五月瞿唐險
天入三巴鳥道迴蘭若清猿聞苦竹袈裟細雨憶黃梅
玉泉智者還相見應說鄉人海上來

投贈兼善都水二首

尚書北柱最清高持節東南護水曹千載河渠數劉向
一時詞賦重王褒玉垣天近含雞舌阿閣朝迴拾鳳毛
更憶龍池舊時柳年年雨露浥宮袍

視草堂深近玉除每從進講佩銀魚南宮晝漏通青瑣
東井金文煥石渠古篆久知通史籀新詩端擬過黃初
茂陵多病緣行事惟待青冥薦子虛

過南沙曹氏別墅會沈伯熙索賦

虞山相對南沙口曲曲雲林似輞川隔岸花飛春片片

開門青竹雨涓涓故人忽喜經年見清夢已驚三日前
深夜一尊仍惜別還家又是月初弦

送凌元之湖團監稅

廿年作吏辭鄉邑十月司征去信州孫子斑衣方在膝
慈親白髮已盈頭嶺煙散後人歸市春水生時客放舟
莫為微官歎淪落江山如此亦清遊

君子亭

扁舟憶過婁江曲脩竹泠泠隱者家五月涼風生草閣

幾回白月照江沙幽人長夏尋碁局
樨子應門理釣槎
更愛開門玉山裏隔溪千樹種梅花

至正十年十二月十九日義興吳國良持倪雲
林詩來玉山中相與徜徉數日將旋索為別余
與玉山同簡雲林

吳生陽羨溪頭住歲晏扁舟載雪歸江上坐看雙槳去
天邊目送一鴻飛豈無稚子燒桐葉知有幽人候水扉
後夜相思心欲折短簫吹月坐苔磯

寄玉山徵君

仙人愛向桃源住曲曲雲林勝輞川秋水到門船似屋
青山當檻樹如煙常時待月溪邊立最愛梳頭竹裏眠
我有好懷清夢遠題詩還到草堂前

虞山道中有懷玉山徵君

言偃宅前湖水東千門楊柳綠搖風一篷山色斜陽外
半夜雨聲春夢中獨客年年如旅燕行人草草似驚鴻
芳洲杜若憑誰采心逐寒潮處處同

次韻周子通應奉見貽

文星一箇落南州太史今為萬里遊
雲漢依然天北向風波已見海安流
亦知王粲久為客惟有杜康能解憂
欲問南山射虎者數奇何事不封侯

玉山草堂

玉山草堂深復深沿洄路入婁江潯
溪桃始華日杲杲風磴積雪春陰陰
皁蓋屢過嚴武駕白頭不愧杜陵吟
稍待清秋林壑靜杖藜與子一登臨

姚文奐

書聲齋即事

書聲齋底有新涼行李挑詩上夜航
月色滿襟隨我去
秋花如玉為誰香
十年客路知今日
百里胥門尚故鄉
朝野太平霑寸祿
不愁白首未為郎

次友人韻

索居郭外景蕭疎
況是秋風落木初
少出不知今日事
老來猶讀古人書
題詩遠寄何煩爾
載酒相過尚憶渠

見說汾陽多貴客
問君誰是馬相如

熊夢祥

客懷奉東玉山

我昔離家七月強
只今十月隕清霜
可憐濁酒黃花興
應悔青燈白髮長
翠袖天寒修竹暗
綺窓日暖吐茸香
夜長枕上揚州夢
江北江南是故鄉

代玉山戲荅

秋水藍橋一尺強
愁聞玉杵搗元霜
東籬老子烏紗薄

西郭佳人翠袖長
古寺竹深禪榻靜
晴窓花落硯池香
西風鶴背三更夢
笑看瑤花作醉鄉

呂誠

詠菩提葉燈

寶林萎葉墮天風
一落人間便不同
雲鏡熒煌開月匣
并刀裁剪費春工
星攢蜩翼冰綃薄
華擁蝦鬚玉柵紅
從此可傳無盡燄
五湖今有水晶宮

菊田

余客竹州三年頗有彭澤東籬之好古人亦謂菊
獨以秋花傲兀於搖落之後非霜下之傑乎昔年
曾賦對菊之歌老興未已復作菊田一首以紀歲
月耳

搖落西風已愴然金蕤月朶為誰妍人間無地安花宅
洲上於今有菊田晚歲擬尋甘谷老顏齡幸值傳延年
落英餐盡秋香骨許我飛行作地仙

做李商隱

華落銅盤蠟炬融
逶迤春色照夫容
當筵行酒金釵側
隔座吹笙繡幕重
已有鸞刀飛鱠縷
未須翠釜出駝峰
夜深環佩雲中過
宛在瑤臺月下逢

周砥

送趙一陽真士歸雪上

渺渺晴湖白鷺飛
青山迢遞夕嵐微
開操桂檝雲生腋
欲採芙蓉露滿衣
紫翠房深丹竈暖
松杉秋靜鶴巢稀
明年去覓封君達
應駕青牛說息機

次韻介之夢山中

松花金粉落春晴
白鶴看棋如客行
疎雨竹窓緣是夢
隔林茶臼只聞聲
繁華久困心何得
澹泊相遭思亦清
不有鹿門高世志
山中幾日道能成

玉山草堂

憶女草堂何許在
辟疆園裏玉山墜
方牀石鼎高情遠
細雨茶煙清晝遲
鴻鴈來時曾會面
枇杷開後更題詩
山中容易年華暮
書史娛人總不知

顧仲瑛芝雲堂

芝雲主人絕蕭散燕坐草堂門不扃古鼎隔簾香裊裊
新篁拂几玉亭亭十年苦思耽書卷三日清齋寫道經
邀我醉眠書畫舫月明吹笛看雲汀

次孝常韻二首

美人開宴酒如泉滿目風光碧似煙半嶺暮雲猶掩冉
一林秋竹自嬾娟新詩每荷邀同賦短棹相將恨未緣
會面幾時還別去百年人事總堪憐

秋波漠漠靜朝暉
畫舫開筵興不違
濁酒清歌香縹緲
青山黃葉路依稀
夜涼金鴈箏聲細
雪滑銀盤鱸膾肥
顧我慙為塵俗累
不能同載月中歸

因泉公歸簡王二秀才

千巖春靜一僧歸
相送空林夕景微
茶具等閑拋石閣
釣竿行已卧苔磯
草生南浦牽詩夢
鷗下輕波識道機
若見王喬煩借問
雙鳬何日向南飛

縱筆

數卷楞伽一縷香門前塵土浩茫茫何人尚覓安心法
此處真堪選佛場寒月流為千嶂雪曉風驚散一林黃
可憐結習消除盡筆舌紛紛故未忘

孝常西齋守歲讀王臨川除夜寄舍弟詩愛其
詞致清遠因用其韻各賦一首

殘雪半窓春意動餘香一榻夜忘眠燈前對酒須今夕
客裏題詩尚舊年風竹蕭蕭還自語寒梅的的竟誰憐
知君賸有滄浪趣待約秋風上釣船

食茯苓粥

荷鏤穿雲得茯苓作糜從此謝臙腥齋廚自啓添松火
香韻初浮滿竹庭時憶紫芝歌舊曲尚尋黃獨制顏齡
今晨暫輟青精飯與結方壇味玉經

張簡

次韻慶雲衲

東來孤鶴下林梢破屋蕭條不剪茅洗玉池頭雲氣合
繡經臺上樹陰交閒心詎遣神為馬辟世方慙祝代庖

忽寄新詩到元圃清歌復藉玉壺敲

次韻范景逸立春日病中之作

歲暮西岑雪未晴范公祠下少人行探梅踏凍煩丹使
扶病迎春問麴生石竈茯苓和雪煮雲根流水似冰清
瓜田數畝春泥暖好課巖中子弟耕

次韻張田秀才見寄

樹杪青蟲晴飈絲春城風物似年時貧餘許邁餐金法
閒有陶潛飲酒詩芳草青青連野闊征鴻歷歷渡江遲

長洲故苑煙花外千里懷人入夢思

寄叔方先生

盧橘花開梓樹疎故人安穩在樓居
翠簪狎坐春行酒絳帳懸燈夜讀書
未必醉來忘簡寂祇緣老去尚高虛
離羣應念任春者道遠天寒欲命車

破山礪上聽水

破山龍去雨初歇坐聽飛泉濺石岡
萬壑風雷喧地軸九秋雲露瀉天潢
好從細草陳瑤席更趁飛花送羽觴

餘犢上流奔軼者何年來此結茆堂

次韻寄鐵厓

鐵笛先生老更迂
摩空有賦擬相如
奇文一變中吳學
大筆猶編後世書
絳帳風搖珠絡素
水窓雲沁玉蟾蜍
小娃唱徹新番曲
多是芳亭春雨餘

黃玠

書畫舫

扣舷擊節起歌鳴
一榻橫舟小結廬
篆籀古文三代上

丹青妙手六朝初虹光貫月夜將半江影涵秋涼有餘
零落宣和舊時譜無情汴水正愁予

金粟影

曲曲闌干屋角西波光夜色靜相迷花跗絕似鑄金粟
木理真同截水犀移席就涼留客久舉杯邀月近人低
長生豈必元霜劑玉杵爛春紅雪泥

碧梧翠竹堂

瀟灑碧梧連翠竹是間不著一塵紅涼陰滿地散如水

清氣有時吹作風把酒聽鶯來扇底罷琴呼鶴出樊中
最思長夏無煩暑雪藕調冰與客同

湖光山色樓

山色湖光樓上頭闌干十二古今秋一川碧浪與天遠
滿地白雲如水流往事只聞吳苑在幽人多愛習池遊
當年風景尋常好日日芳筵爛不收

漁莊

漁莊無歲不豐年三十六陂多似田釣者得魚還易粟

市官有稅却輸錢霜天斷下團臍蟹冬日槎頭縮項鱖
想見牙籤滿書案教兒兼讀種魚篇

翟份

題倪原道金粟塚燕集圖卷

北山良夜風露零聯翩綺席開林垆秋華錦石客愁破
沙月水煙詩夢醒池面縠紋扶杖看樹頭筭籟把杯聽
曠達何須論強健從教荷鋤似劉伶

李廷臣

奉同鐵厓賦寄玉山

玉山溪路接仙源漁郎繫舟老樹根望海樓臺浮遠市
開門湖水落清尊珠光弄月寒丹室石氣酣雲暖藥園
聞說鐵仙曾此宿吹簫清夜洞庭翻

李元珪

雨中夜宿瓜州江渚

春陰江浦易黃昏雨裏人家早閉門歸鴈雲間知塞路
過帆沙觜帶潮痕遙瞻北固青山郭只隔淮南綠水村

野寺疎鐘到孤枕閒愁清夜與誰論

秋暮夜宿望亭

茅屋沿堤密掩扉官橋昏黑泊船稀
守關戍火明村塢隔岼漁燈照石磯
寒木盡隨溪雨落斷鴻猶趁野雲飛
篷窓欹枕渾無寐倦聽人家夜搗衣

陸友

次張貞居所賦雲林

松花新釀碧琳腴洗杓何妨起病夫
茵閣下簾修隱訣

雲林埽榻挂仙圖旋移竹近文書案自汲泉添刻漏壺
聞說華陽多玉食洞中燕肉膩如酥

張師賢

次郭義仲韻東玉山人

故人一隔紅雲島相見銀屏七夕前花近小山當鶴
溪深嘉樹覆書船參差清吹流銀漢饕餮文彛散玉煙
更擬此君亭子上醉敲紗帽會群賢

沈性

玉山佳處

片玉山中秋日來竹梧清影落蒼苔飛樓坐接青天近
別館行穿綠水迴政似米顛留海嶽尚傳摩詰賦宮槐
鷗波艇子重相過更待桃花滿洞開

分題龍門送鄭同夫歸豫章

峭拔終同禹鑿存折盤雙磴竦雲根青天鳥沒仙人掌
黑骨龍歸箭栝門寒落雲泉搖暝影晴開石鏡見秋痕
詩成待刻嶙峋上遲子重來與細論

漫興用郭義仲韻

近知消息苦難真一日千迴憶故人極目風煙迷黑海
驚心花鳥惜青春清談王衍休揮塵多事元規已污塵
重上高堂見君面碧梧翠竹喜清新

衛仁近

題陳履元畫玉山草堂圖

萬木陰陰覆草堂湘簾低下淨琴張逶迤萬里橋南路
彷彿百花潭上莊白鳥向人飛箇箇好山當戶立蒼蒼

披圖想見人清絕為寫新詩並晚涼

馬磨

和楊廉夫新居韻

楊子樓居飲馬河書舟日日棧晴波未論粟里功名薄
總為夔州詩句多遠樹如簾青若薺亂雲渡水白於鵝
何當共把凌風袂醉和仙人鐵笛歌

岳榆

柳塘春

二月風柔雨霽初芳塘流水碧珊瑚欲維畫舫絲猶弱
稍撲湘簾絮已無微影揚波驚鯉隊新陰分色映蘼離
調箏莫按陽關曲時到藏鴉興未孤

李簡

秋興

黃落山川秋氣高一聲白鴈過江臯西風芳篋收團扇
涼月重簾落剪刀倦志已孤紅叱撥牽情何事紫檀槽
吳霜易點青青髻莫道當年記得牢

張遜

無題四首

銀屏曲曲掩秋塵何處車聲五色麟
飛燕曾為掌上舞崔徽不及卷中真
蕙花清露紉成佩菱帶文波繡作茵
獨倚疎桐無限思盡憑雞卜問江神

一夜冷風入翠幃夢魂長是繞湘江
香螺脫轡煙生幄荳蔻含胎蜨滿窓
碧岫臺空雲雨斷絳河星動女牛雙
牢愁得似秦城遠幾日重圍未肯降

采蔥涼月午陰移漠漠重簾怨阿嬌竹泣啼紅猶染淚
藕分纖碧尚牽絲題封欲寄金條脫收子休彈玉局碁
惆悵章臺南畔柳何人折盡最高枝

新水流雲滿綠臯畫橋微步聽黃袍空傳解佩酬交甫
只惜能詩似倩桃柳色障塵侵小扇荷簫含雨瀉金醪
蛾眉老去多陳迹懷古懷春謾自勞

顧達

碧梧翠竹堂

玉山之堂絕蕭爽
梧竹滿庭深且幽
出簷百尺擁高蓋
覆地六月生清秋
玉繩挂樹月皎皎
翠袖起舞風颼颼
石牀碧華亂如雨
仙佩夜過鏘鳴球

文質

和友人韻東玉山二首

我愛虎頭公子賢
高懷歷歷瀉長川
酒尊花底分秋露
茶竈竹間生白煙
日落漁莊聽雨坐
風微草閣看雲眠
西涼進士曾留別
應說相逢十日前

玉山之堂風日好
高居共喜值清時
紫簫度曲頻行酒
綵扇分題即賦詩
溪樹積陰疑雨過
水花流影若雲移
白頭有約漁莊上
我亦歸來理釣絲

顧敬

次廉夫韻寄玉山

玉山幽深草堂好
翠竹森森映白沙
栗里歸來陶令宅
桃花開處杜陵家
風來野樹留歌鳥
雨入溪流送落花
我欲問津從此去
天涯何處有星槎

華翥

玉山草堂

我愛玉山之草堂
清秋樹色正蒼蒼
虎頭癡絕情真癖
賀監歸來老更狂
傍席好花迎佩落
當門立鶴過人長
何時月下將簫管
醉倚闌干學鳳皇

垂虹橋

何人拔起蒼山根
挾來壓住江流奔
二三百尺斷虹影
六十二灣清月痕
玉闌雨過翠苔滑
石洞舟行清水渾

幾欲臨風又題柱恐驚司馬未招魂

陸仁

題金陵

麗正門當天闕高景陽臺下草蕭蕭江園大地蟠三楚
石偃孤城見六朝落日不將遺恨去秋風能使旅魂消
忘情只有龍河柳煙雨年年換舊條

東玉山徵君兼五老貞士

王子岡頭雪未消玉山池館鬱宮雋美人詞賦宗枚乘

仙客風流似子喬
竹裏行厨通一徑
柳邊飛閣度雙橋
澧蘭沅芷思無那
心與車旌日在搖

奉懷玉山

馬鞍山色兩峰尖
時送飛雲落畫檐
金鵲焚蘭煙娜娜
銀鶴舞隊月纖纖
語調鸚鵡花連屋
影拂鳩鵲水動簾
緣想清遊共于鵠
定多賦詠照牙籤

寄五峰李著作

小車上直過車溝
城闕沈沈十二樓
太乙靈光金匱夕

少微星采玉垣秋齋房度曲歌朱鷺海子驚弦起白鷗
想得賜金歸里第鴈山依舊足清游

沈右

顧仲贄移居詩次叔方先生韻

城南陋巷居新僦綠竹移來幾箇斜叢桂山中招舊隱
讀書堆裏認君家蜀人漫詫文園賦吳市爭看衛玠車
斷簡味腴如啖蔗虎頭癡絕至今誇

叔方先生過詠歸亭二首

短棹相過莫便回詠歸亭上且低徊升堂拜母稱觴後
隔竹呼童淪茗來八尺駝尼分紫錦一雙蠟屐破蒼苔
空江草木雖搖落猶有寒花帶雨開

積雨空林喜報晴杖藜隨意傍江行天寒木落青山出
日轉沙虛白鳥鳴漫擬東林時釀黍自憐南畝晚歸耕
潁川高士能相過閒把瑤琴膝上橫

來鶴詩贈周元初

緘誠上達魏元君俄頃神霄下鶴群頂鍊大還丹鼎火

翅雷南嶽嶺頭雲仙人騏驎秋風遠王子笙簫午夜聞
惆悵世間留不住却驂鸞鳳出霞雰

金翼

鄭宜州蘆花淺水亭

新築茅亭也自幽闌干曲曲面滄洲一簾花氣都成雪
片石潮痕祇沒鷗客醉有時迷夜泊月明無處覓漁舟
老夫亦有滄浪趣便欲移家住上頭

王巽

正月八日詣玉山草堂不遇舟中錄記

鼓枻溪頭動曉行衣裳潤浥露華清東風移帆浪花起
幽鳥避人霜羽輕片玉峰寒松倚秀草堂春早柳含情
山人領鶴之何處惆悵歸來雨滿城

陸景龍

楫拙窩

安樂窩中興澹然靈根斫得自樵仙地爐伏火春如海
雪屋圍風夜似年香透玉酥和芋撥脂流琥珀帶松然

絕勝溟水燒金鴨吹徹參差惱醉眠

梅影

一自逋詩為寫神橫斜意態宛如真壽陽鏡裏春風面
仙子江邊水月身晴雪隔窓花似霧凍雲印地玉無塵
夜深低轉雕闌去空憶羅浮夢裏人

杜甫遊春

杜陵野客興蕭騷策蹇行春樂更饒楊柳暖風欹醉帽
杏花微雨溼吟袍推敲漫說衝京兆清絕徒憐過灞橋

直許文章光萬丈謫仙聲價兩相高

紙帳

溪藤搗雪淨無瑕素箔圍風絕可誇夢入清虛明月偃
神遊廣漠白雲遮繭窩春暖浮銀色鮫室宵分散玉華
野鶴一聲天已曙老夫詩思繞梅花

題鎮南王納涼圖

憶昔揚州全盛日內家輪奐見翬飛芙蓉仙館紅香凝
楊柳歌臺紫翠圍雲母屏開秋澹澹水晶簾捲月暉暉

十年一覺繁華夢春草王孫怨不歸

柳南小隱

參軍家住南湖上楊柳蔭門春水生落日池臺看洗馬
東風簾幕聽啼鶯長條拂翠陰垂地三月飛花雪滿城
每為論兵來好客傍人錯認亞夫營

邾經

題唐伯剛貫月軒

使君文采欵翩翩投檄歸來志浩然新構鳳麟洲上屋

恰如書畫米家船
干將破壁龍俱化
脈望飛空蠹亦仙
更試囊中五色筆
桂花香露灑銀箋

陳汝秩

題王叔明溪山圖

前身定是王摩詰
黃鶴溪山似輞川
薜荔十尋緣綠樹
芙蓉千仞倚青天
長歌不用來招隱
閉戶當應疏草元
怪底西風波浪惡
披圖莫上五湖船

舒頔

雨窓偶成

雨壓中天雲霧低，華陽閣外草萋萋。
湘江夢遠縑塵隔，閭闔門高紫氣齊。
紅拂杏花沾翠帽，綠拖楊柳憶金閨。
故人騰踏煙霄上，何日相從信馬蹄。

度萌坑嶺

雨過郊原綠倍添，竹輿行處倦厭厭。
翠垂松葉沾衣袖，紅綻花枝映帽簷。
石澗水香麋麝過，林梢露重蜨須黏。
嫩晴天氣催農務，麥飯新嘗似蜜甜。

泥

九陌香塵濕不飛融融隨步襲荆扉玉驄行疾濺春雨
紫燕銜遲帶夕暉蚓竅吐淤黏履齒鳳書封漬汙朝衣
夜來滿地沾飛絮指點行人石徑歸

贈孔希文歸浙

我愧為儒事筆田君來枉顧辱佳篇半生騰踏江湖日
孤館蕭條風雨天青眼故人能有幾白頭詞客更誰憐
江東遊徧浙西去風攪蘆花月滿船

次孤岳主人韻

相逢偶似虎谿橋借榻仙房卷十朝
無補但思遼海去
投閒安用小山招
吹噓暖雨披紅萼
攬掇春風上翠條
塵世浮雲隨變見
且容花鳥伴淒寥

九日飲姪女家

菊花杯泛茱萸酒
楊柳村沿石鏡山
門掩黃雲千百頃
谿藏紅葉兩三灣
歡然自覺情難盡
醉後都忘夜易闌
細雨斜風休作惡
歲寒心事正相關

南山秋色樓為陳孟德賦

秋色橫空眼界寬
玲瓏八面見峰巒
稻花香滿雨初足
梧葉聲清風正寒
百尺不教餘子卧
四時那許俗人看
課孫教子無他事
笑指闌干醉解顏

舒遠

幽事

樹繞重門盡日陰
倚風時聽晚蟬吟
采松釀酒開除事
畫紙圍碁消遣心
親舊殊方音邈邈
兵戈滿地夜沈沈

眼前得失君休問家住雲窩深復深

舒遜

送丘克明副使休官歸河南

二孤高枕大江流天入蒼茫日夜浮
帆影遠連巴蜀曉
榜聲清入洞庭秋
菊松雅興同元亮
泉石幽盟慕許由
別後相思梅正發
月明千里倚江樓

和謝宗可霜華花霧塵詩

宿酒禁持夢乍醒
陰陰芳樹鳥無聲
輕籠翠色溶溶曉

漸復紅香淡淡晴誤避茶煙跼老鶴慣藏柳影咽嬌鶯
東風却怕花神怪捲起霏微幕不成

周霆震

清和華道士蕭宗元

月滿虛堂奏帝歸仙風吹送紫雲衣九還欲致三花聚
一悟能消萬劫非老樹鶴棲存夜氣清池魚躍見天機
黃冠免得山陰客未信詩盟與願違

次韻劉道原九日

曠劫何當洗塼埃
凌高欲藉海為杯
巫山雨暗猿相引
汾水雲深鴈不來
新釀偶憑茅舍瀉
寒花時向槿籬開
仲宣幸有荊州託
未厭吟邊數往回

張端

和秦仲對雨

雨多檐溜響潺潺
矮屋深窓面面闌
秉燭襟期憐晝短
看花心緒恨情慳
銀塘水滿鷗先下
翠幕春寒燕未還
執戟揚雄今白髮
久無夢到紫宸班

次韻酬馬國瑞都司

老去人間百不宜，晷長何補歲陰移。
絕憐識字翻投閣，肯為窺園廢下帷。
一樹梨雲迷醉眼，十年春草誤歸期。
倚闌片月能知我，故故穿雲照影遲。

穹窿寺次倪雲林韻

穹窿佛寺買臣居，臺殿猶存漢代餘。
山勢盤陀真是畫，泉流宛委遂成書。
從渠說夢迷蕉鹿，著我眠雲聽粥魚。
十頃薄田桑八百，南陽只合卧茅廬。

秋懷

半年旅邸愁聽雨七夕樓頭偶見星
竹樹蒼蒼思故國江山歷歷話新亭
誰家素練敲明月獨我絺衣步廣庭
住向錦城心未樂自緣垂老感飄零

荅大方厓禪老

吟得詩成寫貝多維摩問訊意如何
貪看案上傳燈錄不管門前奏凱歌
寸寸娑羅低作樹累累窄堵亂成波
黃花翠竹西風外杖屨無嫌屢見過

送徐仲盟還松江

十年不見南州士
吳下相逢涕泗橫
髣髴蒼蒼俱老大
襟懷耿耿尚崢嶸
年來江上魚無味
夜半雲間鶴有聲
明日扁舟入空闊
岸花汀草不勝情

吳志淳

春日遣懷

貧病相兼氣未舒
田園雖少樂耕鋤
為儒已入他州籍
垂老頻收故國書
夜雨湖山人去後
春風門巷燕來初

潘生喜遂閒居志阮籍從教禮法疎

春游二首

湖上輕風吹柳絲湖邊細雨濕花枝
百年總有三萬日一日都來十二時
杜老每尋崔氏宅山翁偏愛習家池
乘閒取醉真吾事度水看花也自奇

上日開筵曲水濱年年相憶在茲辰
千家榆火催寒食萬點楊花照暮春
紫燕却歸尋舊主黃鸝到處喚遊人
東來巢父如相問為覓風流賀季真

鄭元明高啓文攜友人所畫谷口圖訪予湖山
未幾啓文先入城府元明獨留僧舍一月講明
古今詩文墨制及秦漢以來書法歲晚將歸永
嘉賦餞

竟日過從喜有餘蕭蕭行李借僧居江雲影落山窓靜
野水光涵夜月虛石臼松煙和露擣寒林柿葉帶霜書
天涯回首多離思空有新詩獨起予

閒居東湖述懷

野叟耕鋤喜近郊柴門風雨夜蕭騷卧龍豈欲煩三顧
老鶴長鳴向九臯北闕湛恩新賜爵近臣傳勅舊同袍
自憐經濟全無術祇有山林興最高

宿龍菴懷友

高情久矣念離群獨向山中禮白雲龍送雨來留客住
鹿銜花去與僧分疎星出竹昏時見流水鳴渠靜夜聞
却憶故人江海去題詩誰是鮑參軍

朱希晦

寄周廷石

門外曾無長者車一身奔走豈安居誰憐杜老常為客
我怪洪喬不寄書煙色春歸楊柳底雨香紅入杏花初
溪山只尺風塵隔却憶情人會面疎

次韻簡緱山侯德詢徽之二徵士

幽尋杖策繞林泉隨處遨遊興灑然曾向山中招隱士
欲來海上候神仙雲深丹竈長瑤草水滿石池生碧蓮
薄暮憑闌時送目白鷗飛雪點江煙

和韻簡天則上人

涼風嫋嫋晚秋天潮落雙門纜客船

永嘉郡城北有二門郭璞所立名雙

門九陌黃塵蓬鬢底一籬香露菊花邊故鄉鱸膾牽歸

思近砌蛩聲攪夜眠不道分攜成遠別幾時林下細談
禪

訪雙溪上人不遇

雙澗縈迴石徑微煙嵐分翠濕人衣松林夜靜鶴初睡
花院日長僧未歸萬里雲霄飛錫遠半江風浪渡杯遲

無緣相見空相憶自歎心期與願違

臘日偕葉東白蔡伯恭登西岑

絕頂雲深一徑通寒生短髮怯天風
千年物色闌干外萬井人家圖畫中
宿雨亂滋嵐樹碧朝暾深浴海波紅
我來欲訪香山社醉酒長吟憶遠公

魯淵

重九

白鴈南飛天欲霜蕭蕭風雨又重陽
已知建德非吾土

還憶并州是故鄉蓬髻轉添今日白菊花猶似去年黃
登高莫上龍山路極目平原草木荒

余詮

送張德常之松江判官

萬彙涵濡雨露中百年文物脩飄蓬鱸魚獨擅吳中美
驥足寧如冀北空肝膽幾時酬楚國里閭從此變王風
吳淞江水秋無底好與使君襟抱同

吳哲

遣興荅李道源

徒步何憂髀肉消
賦歸無待楚辭招
摩挲藥籠三年艾
落人寰五石瓢
蓑笠雨淹滄海釣
斧斤晴趁白雲樵
遊仙枕上西池月
轉覺東華曙色遙

丙申三月從平章左公總戎臨安過南山訪楊
鐵厓先生時溪漲馬不克渡延佇口號

旂旄晨趨十萬軍
衛青幕府事紛紛
卧龍不遠滄溟窟
走馬來看館閣文
春過明山花亂落
雨晴飛瀑路難分

先生高伴洪厓嘯獨向溪邊望白雲

小孤山

中流玉卓迴無群大海雄藩自楚分

宋高宗大書顏其厓曰海門第一關

絕頂薰薌常蔽日靚妝樓閣不藏雲孤根閣入龍棲宅
亂水平鋪鳥篆文我欲維舟明月裏為神鼓瑟候湘君

周南老

虎丘次和邾進士仲誼韻

公餘聯騎入山城老衲追陪得散行短簿祠前看竹色

小吳軒上聽松聲來游故苑春將暮歸去南樓月已明
題徧新詩佳勝處定應商略過天平

鄭洪

寄林仲實主簿

新築書齋壁未乾盟言誰信未曾寒春風不到梅花帳
曉日常懸苜蓿盤鄉里總知新部曲朝廷不改舊衣冠
分明寄謝嵇中散莫把尋常冷眼看

題碧雲樓

一柱樓臺從地湧，八窓圖畫自天開。
雨中日脚青紅暈，霧裏山容紫翠堆。
析木高寒天似蓋，蓬萊清淺海如杯。
洞簫一曲吹黃鶴，肯信愁腸日九迴。

過菑溪隱居會項從理

樹繞河堤水繞門，人煙雞犬自成村。
清時自保無兵甲，白屋相傳有子孫。
彷彿巴仙藏橘圃，依稀晉士入桃源。
柏臺小吏吾知己，日日相逢具酒尊。

次王蒼雪韻三首

茜溪春日淨暉暉
蝴蝶雙雙上客衣
流水桃花聊避世
滄江鷗鳥自忘機
迢迢魏闕江湖遠
渺渺吳雲日夜飛
官事有程歸未得
南風吹老北山薇

百年王業在豳風
九鼎猶存澗水東
共喜干戈指淮甸
兼聞仗節下崆峒
青袍白馬飄零外
羽扇綸巾指顧中
昨夜天公洗兵甲
一江雷雨似飛洪

東閣諸郎總好文
南州多士望龍門
共傳江左風流遠
且喜河汾禮樂存
白纓青絲歸賦詠
黃花翠竹共匏尊

劉蕢一卷匡時策更待青燈細討論

遣悶

柳葉參差杏葉團桃花零落薺花圓那知人事有今日
却憶風光似去年客路青春誰作伴庭闈白髮夢相牽
濃愁深似三江水都在滄洲白鳥邊

秀上人飲綠軒

半勺滄浪歌濯纓一瓢天乳酌靈星紺雲滿漲葡萄甕
青雨常懸瑪瑙餅不向蘇耽尋橘酒却從陸羽校茶經

西江吸盡無窮味濁世浮沈幾醉醒

賞梨花命妓行酒歌詞為賦此

瀟灑東闌一樹春雪膚冰骨月精神朝雲著處迷詩夢
暮雨來時想玉人華屋洗妝歌小小銀餅推枕喚真真
紫微閣下繁華處芍藥荼蘼總後塵

過儀亭

扁舟落日過沙湖十月清霜野水枯穉子刺船爭打鴨
小娃倚市夜當壚紅紅枸杞珊瑚出白白蘆花組練鋪

有約草堂陳孺子夜筭渾酒煮江鱸

題黃子久畫

三十年前識大癡梭鞍桐帽薜蘿衣星霜老髮三千丈
梁棟遺材四十圍圖畫渾如詩句好丹砂終與道心違
筍簣永上青松樹猶覆當年白板扉

題宋元凱都市寺為中正堂畫溪山晚釣圖

百畝青山二頃田金溪南畔竹菴前紺園蒼筍花香澹
寶地杪羅樹影圓日日釣絲牽對雨年年禪榻對茶煙

郎星昨夜明如月偏照君家書畫船

寄甯子堅

澱山湖頭鷗鳥飛謝家泖口鰕魚肥菱花正熟胡人米
荷葉新裁楚客衣鶴立瑤階毛羽整鴈來滄海簡書稀
詩囊織得天孫錦應寄南城白板扉

寄毛府判

南湖水長沒蒹葭西浦橫橋對白沙鴻鴈來時菰有米
鳳皇飛處竹無花石田賦寫張平子雲閣書通蔡少霞

零落江陵千樹橘青門猶戀故侯家

和謝雪坡太守詠新城

十二城樓面面開登高送遠興悠哉玉虹萬丈橫銀海
白鴈千行下弩臺漂泊自憐能賦客艱難誰識濟川才
長江不作東南限拱北樓頭畫角哀

蕭山秋興

雙杵孤砧擣客心野雲江樹障秋陰越王臺上青山小
賀監湖頭綠水深負郭已無田二頃傳家那有橘千尋

卧龍只合南陽老梁甫愁來莫浪吟

送楚良之杭州

七月仙舟泝大江滿江花雨送飛幢
琳琅金轡筆五色天寶龍光劒一雙
春透桃花青海浪秋涵桂樹白雲窓
別離最苦東曹掾醉倒沙頭玉兩缸

寄祇園師煦東白

一別東林遠法師十年滄海夢相思
黑貂已敝猶存舌白社雖貧尚有詩
菰米雲深鴻雁飽梧桐月冷鳳皇飢

台州若問狂司戶張翰湖頭兩髻絲

寄周茂卿兼簡蔡彥文葉德新

客裏無書問起居雲間有客報新除
郎官星彩聯台輔寶劍虹光貫斗墟
蓴菜江湖秋渺渺芙蓉簾幕雨疎疎
東曹二妙真連壁不寄錢塘雙鯉魚

映雪齋

八窓闌檻倚冰梁四座圖書貝月光
眼眩欲迷黃竹賦神遊疑在白雲鄉
瓊臺花滿瀟瀟下石鼎茶浮細細香


想得哦詩清鏡裏
霜娥一夜泣瀟湘

題已上人墨梅

故園梅樹三年別
長憶看花溪雪晴
巧出疎籬自蕭散
近遭碧水更分明
揚州何遜足詩興
茅屋已公無俗情
畫圖忽見轉愁絕
遙想月華枝上生



御選元詩卷五十六



總校官庶吉士臣侍朝

校對官檢討臣蕭九成

謄錄監生臣朱文佐